

新鄉縣續志

卷六傳

新鄉縣續志卷六

人物傳下

廉介

廉介亦庸德之行也自世道寢衰人心不古貪污成俗汶汶者多而此行轉若鳳毛麟角不數數覩史稱廉介特傳可以觀世道慨乎其言之矣然表章所及有起衰振靡之功細行必矜亦足資觀感也

杜世英原名世琛咸豐己未舉人辛未大挑二等授通許縣教諭性嗜學家貧苦讀爲諸生時聞羅帷書爲名孝廉從遊數年遂登賢書然無仕宦想耿介自守日食藜藿晏如也嘗館河內某氏其居停爲著名富紳願爲指捐河內教諭不受城內劉某巨富其甥也請爲捐官英正色曰財帛有數窮通有命其甥不敢復請家居

無事率子弟採樵積肥料有一介不取風卒於通許任所琴書外無餘貲也

邑人孟希聖杜芝田先生傳杜公諱世英字芝田小冀鎮人外渾厚而內精明自幼讀書輒能領悟年甫冠以府案元補博士弟子員所志者大不甘小就嘗下帷勵志博極羣書歷十餘年不少懈其爲文純以意勝不尙辭藻一時諸名士皆欽佩焉咸豐己未登賢書辛未會試大挑二等家貧甚以舌耕謀生活設帳授徒循循善誘希聖嘗親炙其門聆其言論獲益良多然慷慨好義卓越恒流咸豐十一年東匪作亂竄至滎澤擄該縣童子二渡河北上道經小冀鎮被鎮中義勇擊散遺二童子於道旁公聞之收養於家賊退招其家人領去且賦性耿介取與無所苟同邑廩生劉寶仁公甥也以誼屬至戚欲爲公納粟補缺

卜昌王大溫觀察公居停也以公品行端方足爲士類楷範
爲之指捐河內縣教職公皆辭不受安貧樂道其斯之謂歟
緒四年春署理通許縣儒學訓導是年八月因老病卒於學署
嗚呼以學品兼優之人而竟困阨終身不獲大用良可慨也子
五常五常倫常理常陳常綱厥後常理更名肯堂以縣案元入
邑庠焉

馬少波字漢臣恩貢生安貧樂道不求聞達茅檐蔀屋疏水不給
宴如也教授生徒不受貧者脩脯見有恃衿妄爲者以爲有玷膠
庠輒羞與爲伍充鄆南書院齋長處事公正一介不苟邑侯山長
皆敬重之

劉崇素字樸菴幼貧苦力學有斷齏畫粥風弱冠入庠旋食餼以
舌耕供事畜益清潔自勵時廩生有溫保圖財者密與謀輒斥遠

之恥與爲伍秋試屢躋以歲貢終晚年任都公所事力省浮費凡衙前蠹棍來公所騙借錢文者觀劉先生在則縮項而去一介不取一介不與時論咸推重之

崔青嵐字曉山庠生清潔自好公正無私任衛後所局務數十年鉤稽公款出入一文不苟遇事竭誠盡力不辭險難閭邑稱之

朱暉明字熙齋庠生幼失怙恃育於兄嫂性狷介不苟取與衛靜澗中丞賢之延主幕府橐筆從游江浙數省歷十數年勤於職務絕不干預公事故歸而依然寒素惟謹事兄嫂以爲深恩莫報甘旨之遺時恐不給廉正之操孝友之行足以風矣

牛席舉字待選精醫術有延視者無遠近皆赴之偶於途次拾銀一包約五兩餘意必窮人遺失遂寫招帖招領數日馬庄某踵門叩謁云其子在汴所得傭資失之途間徧找不獲悶卧不食者數

口矣詢其數目相符舉以付之不受酌

崔錦屏歲貢生素勵清操取與不苟曾隨婁村許文田赴四川蒼溪縣幕及卸任歸蜀道崎嶇艱辛萬狀衣物一空絕不向許假貸設教近村自安其素許雖相邀亦不輕一往人以是重之

于椿字八千于店人素性耿介臨財不苟應童試赴郡於小店北門外拾一紙包內有白金三錠十餘兩納之囊中不數里見一人奔馳尋視椿問曰子行色倉皇有何要事答云余長村王姓賣牲口於小店取價而歸一時不慎遂至遺失徧尋無獲椿詰其數相符探囊與之其人感激請分一半謝曰我以此非我分內物故取以還舊主豈索謝哉是歲入邑庠鄉里益重其品云

呂蔭棠字芾南歲貢生先世小冀鎮人以教讀徙居暢家岡年十九入庠旋食餼設帳四方以善誘稱年四十有一同治建元以恩

貢候銓選例當授直隸州州判囊橐艱澁不肯赴都時有富室王某願解囊飲助笑而謝之曰以人之貲財作宦遊費負而不償不義汲汲取盈於民以償逋負不仁曷若我行我素優游林下以自娛寧必義冠博帶始爲榮耶以布衣終卒年六十有六

楊守山楊堤人光緒四五年間于店張時中過其地遺失白金五十兩守山家人拾之次日張來尋訪守山原璧以歸張請送匾爲謝不受子俊峯傑峯孝友傳家孫曾蕃衍田產日增其貽澤可以想見

田莫生字瑞圃天性敦篤孝事雙親友愛諸弟幼以家貧僅一應童子試棄而就商輕財重義一介不苟遇有公益事勤慎耐勞歷久不倦如倡修文昌閣瞻汴橋又創建喜雨橋則其最著者雖以弟芸生貴而布衣疏食儉樸自安謙和忍讓力戒驕奢鄉里咸敬

重之宣統二年子文茵於尙書坊南拾得錢袋內有銀二封各書
湘平銀六兩持以告卽令出招帖招領嗣有楊某來云係其壻劉
某代友領餉遺失情急無聊幾釀命禍情事相符付之去雖云小
節所關者大固不止廉介之足尙也卒年六十有五

劉召棠劉司馬村人素行端正動遵禮法見義必爲不輕然諾遊
泮後以母病博稽醫術頗有心得施藥救濟活人甚衆光緒三年
大饑在小翼鎮購杜姓書一部至夜閱之內有鈔票十餘緡曰此
非吾財也人家性命所關得之則生失之則死黎明遂親造其門
還之其人感謝則曰此子分內物與我無干豈索謝乎力辭而去
當困苦流離之際而一介不苟其篤行君子乎

新鄉縣續志

人物傳下

技術

古云雖小道必有可觀殆謂人生才德兼備者難但有一長一藝之足錄皆足名當時而傳後世人非下愚豈可暴棄自甘哉故奇才異能特著之以爲矜式即片長薄技亦節取之以爲無所用心者勸且其中多隱君子焉在識者辨之耳

朱湛字任之長身黑面勇力絕倫常以稱錘重十餘斤者繩繫其環作流星錘舞之輕如一葉而寒風逼人不可近性甚謙謹恂恂若書生其飲酒也至二三杯即面赤目紅頰然而卧鼾聲如虎驚座間稍頃醒氣爽神清無論酒之醇漓杯滿即乾初無留滯縱飲或通宵步履語言依然故我未嘗見其醉也見聽雨軒筆記

南鉞冀龍薛景梅皆業木工技臻精妙嘗共造段村玄帝廟鑿駕一座分爲正殿拜殿牌坊柱繞袞龍壁雕山水雲樹人物又儀仗十八具曰金瓜曰金梨曰月斧曰朝天蹬曰火焰槍曰火焰戟曰大刀曰扇曰迴龍各一雙皆繞以雲龍備極工巧自雍正三年開工至九年始竣後小有損壞木工張士德修之年餘弗成王某嗣修之又年餘仍未曲肖其工巧絕倫可以想見

文紹棠字化南邑諸生小癡弟子工山水花鳥得徐黃大意

衛自權字心裁號杏圃邑諸生善草書合孟津板橋爲一家墨蘭尤妙

周象離字位中邑諸生工篆刻四體書均入超妙

譚炳字虎文書法得過庭神髓勝書不雕不琢氣韻天然

賈萬程字凌九布衣善山水墨蓮尤勝工寫真

杜來銳字晉之書法清臣畫宗海嶽

趙良玉字炳南邑諸生勝書魄力沈雄筆可屈鐵

郭雲燦字瑞五邑貢生善花鳥工草書得其祖河上老人家法詞章之外兼邃醫學

衛家騷字良五布衣畫宗元暉花卉亦瀟灑不羣

衛獻璞字質齋靜瀾中丞之姪繪事雅澹字追魯公惜早卒傳世者少

王精一字子中精眼科光緒初年在京考取太醫院吏目名著一時

王清一字子澂邑庠生賦性靈敏勤學好問於經史諸書一見能解嘗師事邑人郭祥棣武陟王少白後因鄉試不第家居教授生徒遇家貧者不受脩金且更解囊相助工篆書課讀之餘兼習岐

黃治傷寒瘟疫獨探仲景奧旨尤精眼科與其兒子中齊名診病三十餘年活人無算

周純字文顯邑諸生工書子承烈字仿武亦諸生紹衣家學並有盛名

暢國楨字幹卿城內北街人精外科懸壺夷門馳譽士大夫間遇險症多奏奇功且於寒素之家脈禮藥值毫無所取鄉里尤感佩之子金鏞字鐵笙庠生性情和平善丹青工篆刻得枚公家法年逾三十而卒

王增香字華亭翟坡人精岐黃業用藥調引多非時醫所能及北至京邸南至申江到處歡迎著手成春洵一時國手

范希元字紹莘庠生研究性理之學頗有心得而著述不以示人敦敏好義樂善不倦咸同間捻匪擾境所有殉難男婦數百人皆

經其採訪彙報蒙獎恤崇祀各祠人尤感之嗣慕堪輿家言遂習其術所過山川邱隴必流連審睇之談風水處亦輒驗遠近士大夫家卜宅兆域多延審擇指定而堪輿之名以著年八十餘卒

趙修身字道純少業儒屢試未售遂隱於醫而於小兒花痘及瘟疹白喉等症尤精遠近延請者踵相接嘗云小兒科逆症不可治順症不必治所治者惟險症耳世俗庸醫每護症賣藥不顧人之死活最爲可恨故終其身無藉醫求利事人咸敬服弟昶清子繼華亦世其業有盛名

魏琳世居趙村初業儒三十餘年未就乃棄儒習醫診脈論病能定人生死一時稱爲扁鵲復生知縣祝壇舉爲醫官

孟增河字時清精針灸日以針灸濟世從衆索謝手抄針灸兩卷今皆遺失嘗言針必有手法復繼以灸可期速愈如頑麻等冷症

新編醫方卷六
用燒山火法風痰壅盛等症用遶天涼法搐癇等症用留氣法隔氣等症用子午搗臼法疼痛等症用龍虎交戰法赤眼等症用龍虎交騰法其手法之精可以想見

陳僕字溧陽性剛篤學幼時僅一應童子試即抱道自重專攻醫術明天地運氣五行之道通臟腑經絡之精微以藥室爲生涯子錦塘繼其業視病如神孫杞績學好博覽亦精岐黃克承先志相傳爲三世名醫云

陳紹虞字舜卿性剛直專術數善察陰陽五行之氣預知晴雨旱澇嘗評人之貴賤洞悉病源並未來事手繪五運六氣詳圖剏作奇門全圖彙集成帙藏於家

趙繼賢字敬齋增廣生居大家店善數學精研易理決人休咎占無不應一時同道君子造廬請謁者門常如市人咸稱爲君平後

身臨終以六爻自占因訣家人曰吾命盡矣午刻當死速爲吾治喪具家人不之信至午果然

朱秉鈞字道遠幼聰慧惟不好舉業曰習岐黃孜孜不倦嘗曰救人一命勝造七級浮屠若吾輩者何必沾沾於八股貌爲儒生實欲藉之以邀祿也嗣果通醫活人甚衆時稱國手

王道全字資治號蘆溪歲貢生居店後營善草書筆波老幹力透紙背晚年行草尤覺逸興遄飛嗜書者咸寶重之

朱銖字銘也精於支干孤虛旺相之說尤善於醫針灸藥餌所投必效人擬之華佗仲景

段休徵字逸泉庠生筆法秀潤大小咸宜所謂出入逸少兼杜如晦之適媚者足當無愧

杜常體字樂菴庠生書法魯公乘興落筆圓轉自如所書碑碣誌

銘指不勝屈

杜蓮生字小珊蓉珊長子工大小書法兼善篆隸晚年益精

尙萬成楊家崗人性好讀書以家貧不能備脩脯禮年十八父母相繼歿家道益貧嚮學益篤時有李先生設教鄉閭每值風雨不能力農畝輒攜書具從之讀冬春諸生上夜課君則篝燈往從肄習每至夜分晝則躬耕隴上猶時時背誦默繹不稍輟如是者數年諸生所未領悟而君一過了了先生益愛之樂與講論故君雖不克專力於學而心地明澈義理精邃凡所言論靡不津津有味雖老師耆宿與之談不知其幼年失學也及壯益潛心於禪學凡醫卜算數拳技之術殫心研究皆能言其奧竅有就正者口授指畫必使聞者有會於心而後已尤精於堪輿凡古今塋兆無遠邇身歷其地必周覽其形勢詳其得失決其盛衰無毫髮爽以故人